



Republika e Kosovës – Republika Kosova
Paneli Zgjedhor për Ankesa dhe Parashtrësia
Izborni Panel za Žalbe i Predstavke

Anr.148/2019

Paneli Zgjedhor për Ankesa dhe Parashtrësia (PZAP), në panelin e përbërë nga gjyqtarët: Afijete Sada Gillogjani kryesuese, Adnan Konushevcu dhe Faton Ademi anëtarë, me pjesëmarrjen e Zyrtares Ligjore Vlerona Maliqi, duke vendosur përkitazi me ankesën e subjektit politik Partia Liberale Egjiptiane (PLE), me seli në Prishtinë, paraqitur kundër subjektit politik Iniciativa e Re Demokratike e Kosovës (IRDK), me seli në Prishtinë, për shkak të përdorimit të gjuhës denigruese, fyese, nxitëse dhe ofenduese, gjatë fushatës zgjedhore, për Zgjedhjet e Parakohshme për Kuvendin e Republikës së Kosovës që do të mbahen më datë 06 tetor 2019, në seancën e panelit të mbajtur më datë 02.10.2019, mori këtë:

V E N D I M

I. Pranohet e bazuar ankesa e subjektit politik Partia Liberale Egjiptiane (PLE), me seli në Prishtinë, Anr.148/2019 e datës 30.09.2019, dhe subjektit politik Iniciativa e Re Demokratike e Kosovës (IRDK), i shqiptohet dënimi më gjorbë në vlerë prej 1,200.00 (një mijë e dyqind) euro, të cilën detyrohet ta paguaj në afat prej 15 (pesëmbëdhjetë) ditëve, nga dita e pranimit të këtij vendimi nën kërcënim të përmbarimit.

II. Urdhërohet subjekti politik Iniciativa e Re Demokratike e Kosovës (IRDK), me seli në Prishtinë, që brenda afatit prej 24 orëve nga pranimi i këtij vendimi, ta përmirësoj shkeljen e përcaktuar si në pikën -I- të dispozitivit të këtij vendimi, në të kundërtën mund të sanksionohet me dënim shtesë nga PZAP-i.

A r s y e t i m

Me datë 30.09.2019, PZAP-i ka pranuar një ankesë nga subjekti politik Partia Liberale Egjiptiane (PLE), me seli në Prishtinë, dega në Pejë, me të cilën pretendon se më datë 29.09.2019, rreth orës 19:00, në Gjakovë, përkatësisht në Rr."Ali Pashë Tepelena", në një lokal afarist është mbajtur një tubim parazgjedhor, nga ana e subjektit politik Iniciativa e Re Demokratike e Kosovës (IRDK), ku përveq pjesëmarrjes së anëtarëve të kryesisë dhe kandidatëve për deputet në Kuvendin e Kosovës, nga radhët e këtij subjekti politik, prezent ishte edhe z.Lendrit Qeli - Udhëheqës i Sektorit për Komunitete dhe Kthim, pranë zyrës së kryetarit të Komunës së Rahovecit, në rolin e mbështetësit të IRDK-së dhe njëherish edhe moderatorit të këtij takimi, i cili gjatë fjalimit të tij ka pohuar se "*sidomos femrat është dashtë me pas një guxim, sepse para se me kandidu NE kemi mendu mirë përfshirjen e tyre, Jo vajza që kandidohen vetëm si me i marrë me qira në parti, por vajza që kanë guxim dhe mendojnë me ndryshu gjendjen ...*", veprim ky i cili sipas paraqitësit të ankesës, shpreh fyerje të rëndë për femrat e komunitetit egjiptian, për kandidatet femra që janë pjesë e listës për

Kuvendin e Republikës së Kosovës, nga radhët e subjektit politik PLE dhe për të gjitha femrat në përgjithësi, i cili bie në kundërshtim me Rregullën Zgjedhore Nr.01/2012, “Për Kategorizimin e Sanksioneve dhe Gjobjave” dhe atë dispozitën e nenit 3 par.11 dhe nenin 5 par.2, të kësaj rregulle.

Ky takim sipas këtij subjekti politik është transmetuar edhe nga një faqe e Facebook-ut, me emrin “Mahalla Sefes”. Më tej paraqitësi i ankesës, ka pretenduar se z.Qeli, me këto veprime, ka keqpërdorur detyrën e tij zyrtare, duke mbështetur publikisht dhe duke u kyqur publikisht në veprimtari politike tek subjekti politik IRDK, ku sipas të njëjtës këto veprime përbëjnë elemente të veprës penale, andaj edhe ky rast duhet të dërgohet në Prokurori për procedim të mëtejshëm. Në fund ka shtuar se z.Qeli, përderisa ushtron pozitën e punës si Udhëheqës i Sektorit për Komunitete dhe Kthim, pranë zyrës së kryetarit të Komunës së Rahovecit, në të njëjtën kohë udhëheq emisionin “Fokusi Ynë”, , i cili program transmetohet në kuadër të Radio Prosperiteti Chanel, që menagjohet nga vet z.Qeli.

Paraqitësi i ankesës, si dëshmi për pretendimet e tij, ankesës i ka bashkangjitur një CD, njoftimin e datës 13.12..2018, të Komunës së Rahovecit dhe disa fotografi në cilësi të provës materiale.

Në përgjigjen në ankesë të datës 01.10.2019, z.Lendrit Qeli, i ka kundërshtuar pretendimet e paraqitësit të ankesës, me arsyetimin se me prononcimet e tij, ai nuk ka ofenduar askënd, por përkundrazi është munduar të fuqizoj, motivoj, rreth rëndësisë së angazhimit të vajzave dhe grave në vendimmarrje, nga radhët e komunitetit jo shumicë. Sipas tij në atë tubim kanë marrë pjesë edhe përfaqësues ndërkombëtar nga OSCE, dhe vendor nga Demokracia në Veprim, e të cilët nuk kanë vlerësuar apo raportuar për një incident të ngjashëm. Sa i përket pretendimit për shkelje të detyrës zyrtare, i njëjti ka theksuar se edhe ky pretendim nuk qëndron, për faktin se ai nuk mban asnjë pozitë zyrtare në asnjë subjekt politik, dhe asnjëherë nuk ka kandiduar në radhën e ndonjë subjekti politik, se duke i'u referuar lirive dhe të drejtave të njeriut, secili individ, ka të drejtë të ketë një simpati apo të jetë në ndonjë subjekt politik (duke u nënkuptuar asnjëherë moskeqpërdorimin e autoritetit publik). Më tej ka shtuar se sa i përket rolit dhe rëndësisë së përgjegjësisë së tij, në cilësinë e udhëheqësit të një emisioni radio-televiziv për komunitetet jo shumicë në Gjakovë, “Fokusi Ynë”, kjo nuk e ndalon dhe nuk e fuqizon asnjë subjekt politik, kur ata ftohen në emisione për të promovuar, debatuar dhe diskutuar për gjendjen e komuniteteve, konform rregullave në fuqi, kur ata kanë qenë të ftuar por asnjëherë nuk i janë përgjigjur ftesës, duke përfunduar se përmendja e emrit të tij mund të cilësohet puro si inat ndaj personalitetit të tij.

Paraqitësi i përgjigjes në ankesë, ka bashkangjitur një kopje të Rregullës Zgjedhore Nr.20/2019 si dhe një kopje të kartës së tij të identitetit.

Në përgjigjen në ankesë të datës 02.10.2019, subjekti politik Iniciativa e Re Demokratike e Kosovës (IRDK), ka konsideruar se pretendimet e paraqitësit të ankesës janë të pabazuara, duke theksuar se prononcimi i z.Lendrit Qelaj, gjatë tubimit parazgjedhor të IRDK-së, nuk paraqet fyerje për femrat e komunitetit egjiptian, sepse fjalët e thëna në atë tubim, nuk i referohen subjektit politik PLE, e as komunitetit egjiptian, por vetëm lavdëron kualitetin e femrave të përfshira në listën e kandidatëve të IRDK-së, si dhe përmes këtyre fjalëve janë vënë në pah vështirësitë e subjekteve politike për përmbushjen e kuotës gjinore në listat zgjedhore. Sa i përket pretendimit se z.Qeli ka keqpërdorur pozitën e tij zyrtare, duke

mbështetut publikisht dhe duke u kyçur në veprimtari politike tek subjekti politik IRDK, paraqitësi i përgjigjes në ankesë – IRDK, thekson se të njëjtat nuk qëndrojnë, sepse z.Qeli, nuk mban asnjë pozitë udhëheqëse në strukturat e IRDK-së dhe as nuk është anëtar i këtij subjekti politik, se qëndrimet e z.Qeli në cilësinë e moderatorit, janë qëndrime të IRDK-së dhe jo qëndrime të tij personale, dhe se moderimi i tubimit parazgjedhor është bërë gjatë vikendit, pra jashtë orarit të tij të punës në Komunën e Rahovecit. Në fund ka kërkuar nga PZAP-i, që ankesa të hudhet poshtë.

Paneli, pasi që shqyrtoj të gjitha shkresat e lëndës në kuptim të nenit 117 par. 2 të LZP-së, gjeti se:

Ankesa është e bazuar

Nga CD-ja, fotografitë e ofruara si provë dhe shkresat e tjera të lëndës, shihet qartë se nga ana e subjektit politik Iniciativa e Re Demokratike e Kosovës (IRDK), është shkelur dispozita e nenit 33 pika l), e LZP-së, e cila ndër të tjera përcakton se; *‘Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjërsi si në vijim: ... l) përdorimi i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve’*, për faktin se në tubimin parazgjedhor të këtij subjekti politik, nga ana e mbështetësit të këtij subjekti politik, z.Lendir Qelaj, është përdorur gjuhë denigruese, fyese dhe ofenduese ndaj kandidateve femra për deputete në Kuvendin e Republikës së Kosovës. Lidhur me këto prononcime të z.Qelaj, subjekti politik IRDK, në përgjigjen e tij në ankesë, edhe vetë ka pranuar se qëndrimet e z.Qelaj, në cilësinë e moderatorit, janë qëndrime të IRDK-së dhe jo qëndrime të tij personale.

Sa i përket pretendimit të paraqitësit të ankesës se nga ana e z.Qelaj është bërë keqpërdorim i detyrës zyrtare, për çka edhe rasti duhet të procedohet në Prokurori, paneli vlerësoi se me veprimet e z.Qelaj, nuk janë përmbushur të gjitha elementet e veprës penale, keqpërdorim i pozitës apo autoritetit zyrtar, ashtu siç parashihet me Kodin Penal të Republikës së Kosovës, andaj edhe nuk ka bazë që ky rast të përcillet për procedim të mëtejshëm në Prokurorië e Shtetit.

Duke u nisur nga gjendja e konstatuar faktike, Paneli konstaton se nga provat e ofruara shihet qartë se nga ana e subjektit politik Iniciativa e Re Demokratike e Kosovës (IRDK), është shkelur dispozita e lartëcekur e LZP-së, si dhe neni 5 paragrafi 1 pika d) i Rregullës Zgjedhore Nr.13/2013, ku parashihet se subjektet e certifikuara politike aktivitetet e tyre zgjedhore duhet t'i bëjnë në pajtueshmëri me Rregullat zgjedhore të Komisionit Qendror Zgjedhor (KQZ). Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit .

Paneli me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalët, shkallën dhe peshën e shkeljes, pjesëmarrjen e subjekti politik në zgjedhjet e mëparshme që konsiston në faktin se subjekti politik Iniciativa e Re Demokratike e Kosovës (IRDK), ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore si dhe shumën e fondeve që ka marrë subjekti politik prej Buxhetit të Republikës së Kosovës, për zhvillimin e aktiviteteve lidhur me fushatën zgjedhore. Po ashtu si rrethanë PZAP-i, mori edhe faktin që këtij subjekti, i'a dha mundësinë për tu përgjigjur ashtu që në përgjigjet e tij ka mohuar shkeljet e supozuara. Mos ndërmarrja e masave përmirësuese ka ndikuar në lartësinë e gjobës së shqiptuar si në dispozitiv të këtij vendimi .

Paneli konform nenit 120.1 pika a) të LZP-së urdhëroi subjektin politik Iniciativa e Re Demokratike e Kosovës (IRDK), që të marrë masa dhe të përmirësoj shkeljet në afatin prej 24 orëve dhe nëse i njëjti nuk vepron sipas urdhrit të panelit do të sanksionohet me dënim shtesë nga PZAP-i , në pajtim me nenin 120.2 të LZP-së.

Paneli në kuptim të nenit 120.1, pika c), dhe nenit 118.1, të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtrësia

Anr. 148/2019 më datën 02.10.2019

Kryesuese e Panelit
Afijete Sada Gillogjani

Këshilla Juridike: Kundër këtij vendimi nuk lejohet ankesa konform nenit 118 par. 4 të LZP-së.

